

四庫全書

史部

欽定四庫全書

史部

陝西通志卷五十七下

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官助教_臣胡予襄

謄錄監生_臣吳之承

欽定四庫全書

陝西通志卷五十七下

人物三

廉能下

明

侯職榆林人嘉靖辛酉舉人為介休教授擢山東鄒平
令歲饑盜起職捐俸賑濟躬詣盜所諭以大義羣盜
立散遷大名府通判管宣府南路事時代藩占屯田

地七千頃職力爭得還宣大屢警至是挾爭馬價督撫知職才檄董互市職兼示威信邊患始弭尋致仕

歸

延綏志

王學古字子獲朝邑人嘉靖壬戌進士為壽春令調廣宗以治行第一擢判順天府尋遷刑部員外郎具獄多力爭平反無算調戶部遷郎中清苦自砥忤中官出知漢陽府地衝疲又多盜學古丈田均役盜息民安一方稱治學謨字子揚學古從弟嘉靖癸丑進士

初知太谷縣持己廉明令行禁止後治兵岢嵐嚴禁
冒功殺降於河塽築邊牆益築老營堡及賈陀乃河
二堡俺答將以十萬衆入邊學謨知三關不足恃建
議請隔鎮兵為犄角督撫不聽遂陷石州坐謫戍萬

厯初陞山東叅政政績茂著告歸卒

朝邑志

鄭札字伯文澄城人少有志操負笈馬文莊之門砥礪
行業嘉靖甲子舉於鄉起家學博轉信陽尹期月大
治以憂歸起補新樂裁冗拊罷不勞而政舉以高第

入為戶部主事出知夔州皆有能績陟淮陽鹽運使

劉蠹惠商二年卒於官

同州志

劉自化字伯時高陵人嘉靖乙丑進士除戶部主事司
崇文稅令商各以物自占寬算緡額商困大甦司草
場却千金饋司太倉銀庫得前盜臣主名奏治之大
司徒以漕糧過期遣自化往督自化并道抵淮布憲
令漕艘爭先至徐城河忽夜決自化披衣大呼巨艦
載土塞城城完漕糧無恙除岳州臨湘故無城取關

市賦成城民不告勞平江盜出沒吏莫能討自化入境擒渠魁散其餘黨改守登州築城如臨湘青登萊三郡逋賦至萬上書陳之司農蠲逋稅而奪其俸自化大喜曰以吾俸省民脂膏吾所受贏矣兩調山東浙江都運使俱以廉稱遭父喪歸遂不出子復初字貽哲萬厯癸未進士授戶部主事調兵部時有事朝鮮大司馬欲以封貢羈縻之復初力言不可大司馬為之屈出守上黨歲大饑民多轉徙時苦地產之征

乃會計庫藏餘金補之又省站銀歲千兩以牛種給民墾田萬餘畝積粟至二千石郡乃饑而不害尋以飛語降廣東市舶提舉粵有稅銀五十萬素不及額中使持之急復初反覆開說歲止賦十二萬擢淮安同知後持憲川瀘川人曾良弼唆土官攻筠連城復初計擒良弼父子斬之土官奢崇明與雷安民關復初遣人諭止之尋勅駐陽和順義與索囊陰相結七年不貢復初至築城堡練戎馬遂通貢如故調薊門

陞太常告歸

賈志

王庭詩字言卿華州人嘉靖乙丑進士授內黃令政聲甚著時王元美備兵魏博有三郡一令之稱歷藩憲

荆楚多異績

賈志

趙應龍字時化涇陽人嘉靖乙丑進士授伊陽令伊賦輕重不均應龍以九等定民賦賦乃平調臨淮有尸浮水不行應龍密廉得三人攜一婦同舟者收鞠之乃婦殺其夫而投諸水也論殺三人政治赫然江淮

間行取湖廣道監察御史按屯牧事減騶從薄供億
條奏數上皆關治理惜未竟其用而卒孫虞佐萬歷
丙午舉人歷官汝州兵備居官有廉操先任揚州府
時民稱為趙不要云

涇陽志

韋文英字德華嘉靖中舉人知陽城縣有大猾素凌轢
其官稍不如意則訟陷罷之文英捕按伏法境內肅
然同時宦績著於三晉者有鳳翔何廷琦南鄭毛一
鳳汧陽張恕華陰吳講城固方策洋縣紀會廷琦大

寧令力行教化盜賊悉為善良一鳳蒲縣令加意人文椎魯悉知弦誦恕任平遥聽斷大獄曲盡情偽講任萬泉編審丁戶破格開除策官靈丘革耗羨却餽

送會任翼城撫凋瘵恤荒殘咸稱良吏

舊志

張思靜字伯安同州人祖績官容城令有惠政思靜嘉靖中舉進士授翰林改禮垣嘗劾奏英國公某鄔都尉某不法事權貴憚之出為四川參政督採木之役官民樂其不擾有汪四者倡白蓮教稱亂思靜用計

擒之丁艱服闋再起分守河南擢觀察使以病告歸

同州

志

馬永亨字健初韓城人孝廉司訓房山正己陶士即陞
房山令性直質嚴取與常祿外一無所染真心實政
人不敢干以私改河間同知嘗三攝府事視羨金若
浼遷應天治中監織造往例有樣段永亨皆却之陞
常德知府告歸自司鐸至太守厯官三十年清節始

終不渝

同州志

張鏞字伯始武功人嘉靖中進士令曲沃有豪紳占丁役罄一里歲辦數百金鏞力裁之遷大理寺副數辨疑獄多忤權貴終蜀府長史

武功志

康河字汝修德涵弟武功人授戶部主事理鈔關通商裕賦出守兗州培本抑末植善布惠以循良稱移守廣西殫力効職不畏難不辭勞不避嫌不規利以是馳聲亦以是賈怨再徙贛州遂移病歸里

武功志

米輔字良佐臨潼人由太學生判隰州督理糧餉纖毫

不染教民興水利歲收稻萬餘斛又有溫湯者州及屬縣分耕其地州民多頑梗抗賦聞催科者輒持兵相向輔至諭以大義自是輸將恐後及歸吏民遮留

載道

臨潼志

史載民渭南人初任昌平委吏先是為吏者率以虧折逮捕去載民約已勅法報竣後粟豆羨至千三百有奇後任羅山九里關巡檢有豪強恃山險窩盜載民設計擒獲羅令某素怨邑中富人誣以通盜當道檄

載民訊其事被誣家持金為餽載民即唾叱擲出鞠
訊虛公誣者得釋有潘某者私人妻而夫被殺獄經
年不決復下載民潘以金杯白金綺縠托隸役為壽

載民答隸幾斃潘洎婦咸正法

渭南志

張士奇字秦麓宜君人痛親蚤逝置廬荒隴日依松楸
間丁卯恩選授永清令潔己愛民纖塵不染擢守通
州是時貂璫肆燄諸中涓賄賂公行士奇力拒之檄
罷運木車歲省民費三萬金修築舊城疏通運河勞

績大著上賜璽書金爵二盖異典也擢開封郡丞盡

心河防中州得免水患以疾告歸祀名宦

賈志

李時萼字茂夫洋縣人隆慶丁卯舉人初任郿縣教諭
教士有法陞長沙推官佐刑明允擢御史巡按遼東
多著勞勩以忤時貴補夔州知府陞山東副使督學

關東所至美政著聞取士尤稱得雋

賈志

王繼祖字克紹咸寧人性孝友隆慶戊辰進士授兵部
主事監稅山海關謝絕餽遺陞武庫司郎中諸司支

費甚繁繼祖謹出納明簿記陞河間知府政聲為畿輔最以直道不容罷歸薦起補南陽知府抵任當歲歉流移載道繼祖多方賑濟全活數萬尋陞副使告

歸

咸寧志

張世烈字葵亭延安衛人隆慶戊辰進士仕開州牧刑清政簡有古循良風轉戶曹出守青州表率僚屬清

操益勵晉左方伯終太僕卿

延安府志

羅奎字文光淳化人隆慶戊辰進士任上蔡令有羨金

五百奎為募夫繕城著為令田糧久不均奎履畝勘
定積弊一清邑故多豪猾悉按捕論如法以治行累
擢兵部郎中出為萊州知府會歲祲莩流載道時府
治城堞多傾圯奎曰古有興役濟饑者非其時耶乃
募工修築量食支給城工速竣而民賴以存又杖殺
土惡擒治礦首洗誣理枉鋤強扶善循政難以悉數
未幾以讒歸

袁正撰
墓志

薛亨字道行韓城人嘉靖辛酉舉第一人更十年成進

士授戶部主事督餉寧武時戍卒築堤請倍給餉或
議加賦亨不可裁甲馬芻秣之溢額者畀之著為令
遷刑部員外郎擢山西提學僉事教先德行而後文
藝遷山東少參督泰山香稅屬歲大禡市粟賑饑市
牛助耕遷楚副憲理屯鹽水利正經界繩兼并民困
大蘇遷四川參政治涪大修學宮訓涪士民俗為丕
變遷山西按察使治兵昌平尋徙汾州強宗聞公來
凜凜受要束平停獄數十百人置學田養士遷河南

方伯汰筦庫宿弊中丞某薦於朝而晉人議其後坐

罷歸

李維楨撰傳

陳宣永壽人萬厯初年由進士知河南府留心學校加

意民瘼興修渠堰為一時惠政

河南通志

韓希仁字孟元涇陽人萬厯癸酉舉人授高密令勸農

給種三年積倉穀三萬餘石荒歲民賴以生陞知潁

州平康中有陰殺游子弟者具首子弟殺娼自刎希

仁曰即具首者殺之也竟抵死潁民咸服其神丁艱

補濱州濱有巨盜為院司役或首之希仁佯叱曰安
有公役為盜者乎故毀其狀密報院司請付法賊黨
遂絕陞襄陽同知清軍伍稽尺籍覈虛糧積弊一清
督修老農堤以捍水患尤屹然為江漢保障云

涇陽志

郭如魯字唯一朝邑人萬歷癸酉舉人教諭平遙歲荒
盡捐廩米以賑丙戌成進士知曲周縣俗健訟如魯
以德意感諭訟者日寡遷同知東昌府攝臨清廉其
巨猾剔治如法州故舟車算賦地易為緇染如魯嚴

禁內外不使關通廉聲大著以病乞歸

朝邑志

張邦敬字簡甫韓城人萬厯癸酉舉人任嵩縣令擢河南郡丞鹽法屯政多所整飭陞敘州知府敘荒裔文教殘缺邦敬為刊四書五經於府學安奢土司叛亂大兵勦之邦敬理餉有功陞安綿兵備副使調雲南金滄兼攝督學革土番私貢之金勅營伍時閱之制號一方保障陞貴州左參政歸里

韓城志

晉臣字孟蓋長安人父爵官西城兵馬司憲直有聲臣

萬厯間貢生任光祿寺署丞狷介自持常俸外纖毫
無所取人咸以廉吏稱之調元臣從孫為館陶令救
荒恤貧多所全活以守城功陞兵科給事中

賈志

張養才字汝才同州人萬厯中進士為行人三奉使藩
國不受餽遺轉吏部主事厯四司秉公佐銓為冢宰

所倚重終太常少卿

同州志

翟事心字鑑寰朝邑人萬厯中舉人為保昌令政治一
以誠實不欺為本民胥化之喜拔才雋以道德相砥

礪陞東昌通判

朝邑志

常澄字希憲蒲城人父廷奎官青州同知以威稜著澄幼即好學舉止莊嚴由進士歷臨漳東明二邑令惠愷有聲擢吏部主事嚴禁餽送杜絕請托人無敢干以私者予告歸

蒲城志

吳永圖字維懷韓城人萬曆癸酉舉人為榆社令邑素凋敝永圖極意撫循課士勸農恤孤拯弱辨冤獄發誣枉榆民稱為吳青天編審催征尤愜輿情素性耿

介不善逢迎當事者忌之中下考居榆三載行李蕭

然

韓城志

葉期化寧羌衛人萬厯癸酉舉人任汾州推官為政有

風裁且敏於聽斷多辯冤獄人服其明

寧羌志

雷大道字行卿朝邑人萬厯癸酉舉人知廣陵縣時大

侵捐俸以賑墾荒千餘頃遷通判兗州署府事却常

例數千金以母老告歸

賈志

郭性之字鹿坪華州人萬厯甲戌進士官河南布政使

惇大寬仁用心精密民間疾苦無不周詳決疑獄籌
兵餉區處悉中條理致政歸人咸歌思之

華州志

陳諫字直卿華陰人萬厯甲戌進士為內江令素履小
心精明端亮猾胥莫能欺擢戶曹轉餉榆林以勞卒

華陰志

李士達字伯順三原人萬厯甲戌進士授中牟令擢南
京江西道御史謇諤著聲忤江陵出為四川僉事會
天全黎州永寧三土司亂平之擢敘州參議征賊有

功歷陞四川布政使管川東事單騎往征流賊事甫
定以艱歸遂不復出

賈志

王致中字懋和寧羌衛人萬厯甲戌進士任兵部主事
因清直取忌謫河南知事尋陞靈寶知縣靈素苦衝
疲致中救荒恤驛靈人感之祀名宦

賈志

馬樸字敦若同州人萬厯丙子舉人授景州守勤幹嚴
明擁使王監橫甚景民被逮株連數百人民大譁樸
為數稅使激變罪諭譁民解去順永張監議加稅河

間上官已許樸格不行歲荒疫煮粥醫病安流移贖
子女全活甚衆以憂去服闋補易州擢襄陽守積穀
備荒倉庾完實復埋占塘百二十區修南漳堰得腴
田若干頃革裏樊均州光化雜稅後遷滇憲告歸賈志
張徵音字祚康朝邑人萬厯丙子舉人知山右某縣調
河南孟縣作堤以障黃河時稱張公堤又調寶豐政
務優閒徵音智畧輻輳有當世才限於資格不得竟
其志在山右時城守禦盜用鉦鼓柝鈴四物辨方向

後遵用之又著論謂地寡者各於其地如地網法半
高半下以備水潦不惟田得利且可設險其他設施
多類此弟綸音字祚欽萬厯辛丑進士官湖廣副使
以威稜著

朝邑志

白希繡字夢山延安人萬厯丁丑進士授魚臺知縣邑
瀕河民苦濬築往往避役希繡喻以大義民樂趨事
擢吏科給事中丰裁凜然出為參政陞都御史巡撫

山西墨吏望風解組

延安府志

馬協字恭甫同州人萬厯乙卯舉人授廣宗令邑民以
賦重多逃徙者協至榜招開墾度地居民村墟復實
改新鄭縣縣多冗役冗費繇賦不均協力為清理裁
抑汰去二千餘緡遷禹州逋負積二十年協履畝度
田以次豁免以俸足其額值旱疫協為賑濟醫藥發
倉粟六千石賤直售民民賴以寧擢鳳陽府丞清寇
捕盜時屯運久為累協於屯則議覆荒田時徵收謹
委任行政折於漕則議修糧船選旗軍甄運官禁關

津稽留嚴吏書需索皆為一時碩畫遷守辰州辰與
苗接壤協修築邊牆辰民困於漕木協力請減運生
平方嚴剛果自少秉清約服勤茹淡不妄交遊

賈志

李時茂乾州人萬厯乙卯舉人天啓間為黔中郡守重
學校恤軍民值苗衆圍城與民固守多所斬獲後卒

於官

貴州志

王嗣美字實之朝邑人萬厯庚辰進士為太原推官持
己廉約聽斷明允擢南戶科給事屢條時政缺失遷

山西河東道有豪宗屢殺郡人有司莫敢問嗣美按治如律轉江右糧儲徵發押運風弊一清再補河東道拊恤教養曲盡其事遷山東驛傳以病乞休

賈志

武紹祖字克光涇陽人萬曆壬午舉人初授濟寧州學正歷遷四川保寧府知府三巴產茶久為民患紹祖悉蠲去鹽課故擁井井有枯有實有鬻按井而擁無得免者而新井以供他費紹祖獨以新井應擁商困大蘇擢兩淮鹽運使卒

涇陽志

賈嶼字魯玉渭南人萬厯壬午舉人授襄垣諭文教大興尋令崞邑革冗稅墾荒田興水利招流移葺廟學繕城池聽訟公平民以不冤條上邊務十餘事著為令三年移大同通判遂辭歸

渭南志

王如皞字允淳朝邑人萬厯壬午舉人授鄖陽同知值歲凶為分地立限以賑再補永平攝灤州却常例金稅璫勢方張請脫其私人之罹於法者如皞卒論如律擢知貴陽府經理蠻部方畧輻輳制府郭子章每

諮訪焉議建貴定縣以增守禦創恤隱局以尉羈旅
丁艱歸起補兩浙鹽運使奏最為天下第一後告歸

朝邑
志

牛應元字兆坤涇陽人萬厯癸未進士初任光山知縣
創條編法與民休息創建社倉積義穀六千三百石
有奇時光歲貢葛為民累應元募匹自織自解光人
德之三載政治民和有產麟之異陞四川道御史按
蹉兩浙力剔奸竇巡方應天時值權璫開礦借端擾

富室應元捕其黨繩之法璫稍稍戢累遷中丞撫南
贛飭武備核將領拔才能禁苞苴立社學暇則坐臯
比諸生質疑問難不復知開府之尊拜南大理卿刑

部左侍郎予告歸

賈志

文運熙字和一三水人萬曆癸未進士以工部主事擁
兩浙木稅力剔重算商賈為建生祠擢叅議條海防
權宜諸倭不敢犯

賈志

周道直字泰宇臨潼人萬曆乙酉舉人筮仕葭城河水

為患築堤二百餘丈民賴寧居革行戶裁冗役以阜
民便俗為務擢戶曹權稅潯陽裁船課一萬二千金
以蘇商困歸來攜磁器數種而已後守閬郡值渝州
寇變三川震動直親提一旅扼梁山之險以障全楚
又義激石柱土兵解成都圍方敘功酬庸引疾歸

賈志

崔國裕字仲豐西安右衛人萬曆戊子舉人官泰州知
州招流亡墾荒蕪擒巨盜捐貲賑饑全活數十萬人
子爾進字抑菴萬曆甲辰進士授長子令躬行化導

變悍俗為醇良擢御史巡鹽兩浙時議增額爾進力
為請命乃如故按福建聞父有疾拜疏侍養即日就
道後歷戶部右侍郎

賈志

孫崇先字重之扶風人萬曆戊子舉人初任蒙城知縣
陞潁州知州剔弊懲猾人莫敢欺嘗出郊羣蛙遮道
使人尾之去蛙止處掘得伏屍知有隱冤拜禱城隍
神求雪其事是夕夢一馬負纓入中門寤而思之訪
有名馬上英者執訊立服眾咸驚異擢貴陽知府

賈志

第五嗣先字石嶽三水人萬曆戊子舉人為贊皇令建

學宮崇文教立義倉修荒政尋擢金華郡丞告歸

賈志

黃道亨咸寧人萬曆甲午舉人知祁州修文廟立社學
飭保甲均徭役覈詭派革耗羨未期月而政成歲荒
捐俸煮粥救濟招流民開渠墾田得數千畝利賴至

今

畿輔志

李仙品字雲卿高陵人萬曆乙未進士初知長治長為
潞郡首邑歲貢紬疋舊例於道府縣日送樣紬仙品

力請革除擢揚州江防同知嚴緝江賊累擢川北道
會奢賊猖獗奉勅監軍親冒矢石搗穴直入翦賊首
奢崇明遷偏沅巡撫復討安賊獲勝尋告歸卒

賈志

弟

仙風崇禎戊辰進士巡撫河南值流寇披猖州邑殘
毀甫下車百方招撫湯陰西山土賊蜂起躬履行陣

勦滅之城得不陷

河南通志

來儼然字望之三原人萬厯乙未進士為太和令躬行
阡陌勸課農桑有孝弟力田者表其閭戒飭士子烝

丞向化期月邑大治晉兵部職方司主政

三原志

解經邦字叔憲韓城人萬厯乙未進士授嶧縣令嶧田蕪民徙逋賦至二萬經邦請捐積逋民稍集即為建屋市犢具耒勸耕計創官莊三百二十七間蒔田二千二百二十四頃入為戶部主事督海新二倉節羨六萬厯遷宣府巡撫宣兵驕情經邦按部治之又寧武援軍肆掠經邦縛首惡八人立寘之法疏請天下援兵所過制撫得行法上是之加兵部右侍郎經畧

遼東且行以母病乞歸經邦素喜讀易春秋盈虛邪

正間數致意焉

賈志

趙可行字子達盤屋人究心時務兵法水利無不精詳
萬厯丁酉舉賢書為中年令政平治理數月調永城
時多盜當事議屯兵以禦可行請罷兵給民牛種事
遂定又厯夏邑即墨二令安丘盜起擢萊州郡丞捕
魁散脅事平調太原督餉寧武招撫叛兵有功黔南
土寇披猖經畧薦之擢守思南可行明於兵事動中

機宜未竟其用而卒

徐開熙撰傳

李繼志字繩叔府谷人萬厯丁酉舉人除宿遷令山東饑民二萬餘口入境皆賑濟全活之轉西河廳督船

却木商常例數千金厯官兩淮運同

賈志

子國瑞以恩

選官戶部員外有廉名

延安府志

邵可立商州人萬厯戊戌進士任山海關兵部主事廉直剛斷加意人文建文昌書院購古今遺書以教俊彥嘗三劾貂璫四減關稅修鎮東樓工師苦無大木

忽海上浮若干至及落成無贏餘者亢陽不雨三禱

三應士民咸歎異之

畿輔志

劉士璉字翼明三原人萬厯庚子舉人少事繼母至孝

天啓中擢司刑權璫專恣士璉獨拒抗不附崇禎八

年任達州兵備流賊寇成都官民束手無策士璉總

理八門設法扼守危城以全敘功晉本省方伯

賈志

曰

俊字虞臣士璉子崇禎戊辰進士擢諫垣疏通水利

損金修渠數邑獲利累官密雲總督

三原志

魏良槐三原人萬曆庚子舉人初授冠縣令兼攝丘邑
篆先是銀馬儀解必僉派富戶有一役未終而家產
已破者良槐至官買官解民無包賠之累己未歲大
祲煮粥救濟值兵興邑應出牛兵餉銀良槐軫念饑
荒不堪重困捐助以免加派民肖像祀之

冠縣去
思碑記

陞

蒲州知州減賦備荒卓有善政

河中頌
言錄

遷知平度州

州舊有仲哥莊集因年荒逃竄集無人煙良槐招撫

流離人皆復業時有麥兩岐穀雙穗之徵

平度
州集

田有年字立丞扶風人萬厯庚子舉人知江寧縣時魏
璫遣內守備至留都橫甚有年力抗之幾陷不測齊
庶人與妖僧瑞光謀逆有年覺察緝獲之擢戶部主
事權兩淮稅輸羨銀於官陞知袁州府五溪洞蠻叛
有年帥師定之告歸

賈志

楊應震華陰人萬厯癸卯舉人厯守衡州持己廉介官
俸外一切不取勸民息訟案牘蕭然以直道不善事
上官為人所中去日敝筭贏馬居然寒士士民號泣

追送擁不得行有父老奉盆水以進者慨然酌水飲之民勒碑以志其事

湖廣志

胡茂字淡明耀州人萬厯癸卯舉人為漢中教諭值歲饑請尹賑恤尹弗許茂自出衣物率士庶以賑全活

無算竟以是忤尹罷歸

賈志

賈師達臨潼人王永福醴泉人李燦然華州人馬從朱同州人萬厯癸卯同舉於鄉師達為平原令勤敏剛斷陞知趙州益乃心民瘼興利除弊孜孜然惟日不

足遷官趙人詣闕請留乃復守趙晉郎署陞滇南參政平吐蕃有功永福為黎城令極意撫循不事操切及歸黎人肖像祀之燦然為齊東令為政先教化而後誅罰一時吏畏民懷風俗蒸蒸日變從朱知縣陽黃縣太平三縣捐介自守飲水茹蘗卒於官貧不能

斂

舊志

賈克忠字獻我淳化人萬厯甲辰進士任黔縣令以仁明稱陞刑部主事審錄四川出冤獄一百六十人蜀

人至今頌之

淳化志

睦時聘字任衡澄城人萬厯丙午舉人為延津令請蠲荒地賦民頌其德知渾源州鑿水渠令高下可受溉

畝致一鍾遷鄖陽太守卒

賈志

李聯芳字同春朝邑人萬厯丁未進士知涇川時巨盜二紅四紅橫行郡邑聯芳督民兵擒渠魁破散其黨調真定馭吏嚴明自奉至廉遷戶部主事權臨清稅會大旱舟阻商困抗疏謂商亦民也寧虧在官無虧

在商尋陞員外郎卒季弟繼芳字蘭畹萬厯癸卯舉人知三河縣減浮糧三千金長兄時芳萬厯乙卯舉

人仕知州亦有政聲

朝邑志

李采字質軒咸寧人萬厯丁未進士初知嘉定不私羨金尋督餉大同兵備冀北滇南修理戎政董勸農功俱有成績進江南布政使抑權璫肅僚吏風裁卓然

為時砥柱

咸寧志

馬之陞字耀寰綏德州人萬厯中進士官大理評事多

所平反榷稅九江裁加耗之稅歷荆楚驛傳道募榆
林精勇直擣賊巢流寇驚潰攝廉憲抑奔競崇恬退
不法者望風而靡居鄉尤好施慕義人至今稱之

延安

府志

武文達字衷懿涇陽人萬厯中進士授鄆城令勤課耕
織聽訟先出溫語而徐以一言折之民胥悅服歷陞

寧前道

涇陽志

趙於達字汝儀藍屋人萬厯中進士授行人擢御史巡

按直隸督漕運時鄒滕盜起運道梗塞於達日夜竭

蹶廢寢食者五十餘日漕事甫竣以勞瘁卒

西安府志

秦鄰晉字汝睦渭南人萬厯中進士授刑部主事多所

平反出守順德慈惠廉明誠心實政以才調真定治

亦如順德時陞四川副使終養歸

渭南志

王于陞字啓宸朝邑人萬厯丁未進士厯官岢嵐兵備
道流寇掠代城親率兵戰敗之獲其渠魁特陞布政

使予告歸

朝邑志

趙勉字兢喻朝邑人萬厯壬子舉人授新蔡令新蔡夙號疲敝兼多盜勉躬詣阡陌指授錢鏹民始樂業又剔積蠹雪冤獄卻羨金卓然以廉明為治新蔡人

尸祝之

賈志

楊國柱字叔堅涇陽人萬厯癸丑進士授泰興令泰興田多濱江坍漲無定漲入豪右坍累貧民國柱以干畝為一區使不得混淆徭賦以平厯官兵備河東時賊犯隰州國柱整旅誓師擒劇賊混天龍等斬首千

餘級賊乃遁歸里日囊橐蕭然

涇陽志

成琰字鎮寰朝邑人萬厯癸丑進士除鉅野縣調武強興利除害愛民如子遇歉歲蠲俸以賑之遷知夔府清直益著減貨稅置義倉農商感頌卒之日貧不克

辦葬

賈志

潘學曾字省予華州人萬厯癸丑進士為保寧府推官政尚簡靜每行部凡厨傳炊爨之具一一罷之訊獄剖決如流務以得情為主一時有神君之號丙辰猶

寇流劫學曾監軍督餉拮据矢石間遂獲渠魁兩川

以寧尋以勞卒

華州志

耿志煒字明夫武功人萬厯癸丑進士授荊州府推官

荆俗健訟煒遇訟者必先以大義喻之令歸思三日

然後理有一繼母訟前室子者煒曰汝訴先室子彼

必仇汝子是汝自戕汝子也令歸思之遂為母子無

間荆地瀕江漸洋二洲屢被水害煒築堤三千餘丈

人得樂業稱其堤曰耿公堤擢吏部以官監用事請

告歸崇禎己巳再起銓衡內勵冰操外營劇務尋陞
提督四譯館少卿以母老告歸卒於家

賈志

楊楠字毓秀涇陽人萬厯乙卯舉人授寧鄉令時旱荒
又流寇猖獗徵檄無虛日楠處置得宜轉輸不匱以
勞疾卒官弟梧字鳳閣萬厯壬子舉人任青州府同
知與兄友恭甚篤時人比之元方季方

涇陽志

梁棟字伯材安定人家長安登萬厯丙辰進士知泰興
縣倭寇猖獗棟練兵守禦倭不敢犯告終養歸子九

賦萬厯癸酉舉人知西充縣疏鹽課之累民為立石

長安

志

寇慎同官人萬厯丙辰進士授刑部主事調工部出守

蘇州值大水歲饑立法全活復捐俸以足漕糧開瀕

海淤地請減賦額蘇人賴之陞昌平副使轉山西勦

翦毛賊斬獲四百餘級調朔州告歸

賈志

逆璫矯旨逮

周忠介於吳吳民知撫臣某以畜怨中忠介欲甘心

焉某感甚挾郡伯寇公為解民見公輒叩頭呼曰公

能治吳人不能活周吏部耶公用好言勸慰民伏地
悲哀久之卒殲緹帥撫臣乘間幸脫挾公力也撫臣
既免則心甚公得民又內愧益逞其毒欲旁撫縉紳
廉茂之有志節者公又以危詞力爭某稍稍懼益猜
公右諸正人日夜刺公短公廉明無間且終憚公得
民不能有所加

徐汧寇守
去思碑跋

張鑛字陽宇中部人舉明經知武邑縣居官廉介斂賦
不取毫釐輸解有不敷輒出金以償之時武邑多盜

有魏孟祥者都御史猾胥也庇盜而分取以自潤人弗敢問鑛鞠得實孟祥懼賂當事囑免又餽二千金鑛正色拒之竟按以法遂忤上官挂冠歸耽玩林泉

人皆高之

延安府志

衛先範字象極韓城人萬厯乙未進士令襄陵襄有河患先範造浮梁民稱曰衛公橋又加意作人談經課藝名儒多出其門乙丑擢吏部主事胥吏假印為蠹先範至首釐之以忤魏璫告歸尋起考功轉文選嚴

絕私交毅然以簡賢為己任時有鐵板釘子之謠內
璫馬化龍欲有所托先範峻拒之遂中傷去

韓城志

盛以達字子從潼關人居家盡色養以廕除戶部檢校
擢本部照磨摘發冒支官軍俸糧二千六百餘石盡
追還帑時有百戶犯科為薄罰全其祖職百戶暮夜
挾金以謝以達叱之陞後軍都督府都事轉經歷剔
奸飭法省勾稽免徵輸敝竇陋規刮却殆盡所隸十

七衛翕然頌之

墓志

張三汲字禹門華州人萬厯中舉人初授天長令以憂歸復除沅陵令操守廉明刑清訟簡多著愛民之政

沅民戴之若父母焉

賈志

馬逢樂字叔遇三原人萬厯中舉人為天雄判遷莒州

守值大飢捐俸以賑之全活無算終遼州知州

三原志

雷翀字翔宇邵陽人萬厯中舉人任絳州知州郡中飢

饑翀以家所儲粟逾河以濟絳絳人深德之

邵陽志

梁廷建岐山人萬厯中進士官大理寺寺正多所平反

出守河南廉明仁恕嘗請旨賜程邵二賢後裔為博士俾供祭祀士論歸美厯川南兵巡道引疾歸值流賊猖獗養義兵以保護岐城土人立祠以報又同縣曹暹天啓中進士任猗氏人感其德巡按江淮振厲風采肅清僚吏尋叅議冀寧平晉藩之亂釋久沈之寃及告歸寇攻岐城出夙養壯丁守禦賊驚潰城賴以全

岐山志

李喬岱字宗甫洋縣人萬厯中進士授休寧令斷訟如

神恤災禦患盡力民事陞工部主事尋以戶部員外
權稅許野正供之外毫無科斂陞萊州知府喬嶽喬
岱兄也歷官至鶴慶知府亦廉明有聲

洋縣志

陳瓚字玉崗潼關人以明經授岷州訓導陞大邑知縣
清正和平惠義兼盡革除火耗纖芥不染力行教化
幾致無訟民有陳青天之謠

潼關志

第五緯三水人萬厯中舉人學宗橫渠躬行實踐初廣
文於郿重修橫渠祠陞萊安令慈惠愛民勤懇課士

擢兩淮鹽運司副疏通鹽法禁絕苞苴廉聲益著

賈志

王維精字環中萬厯中舉人由教諭陞知肥縣會山左盜起捍城有方畧陞知應州州地險民困惟精撫循

休息政聲卓然

朝邑志

劉子誠字叔貞宜川人以明經授湖南訓導教士以不欺為本立行藝二格有善者記之行勤誦讀者記之藝擢鹽川令陞橫州持節定交趾之難所至皆有治

績

賈志

宜訓字孟庭華州人以恩貢授義眉令時邑山南多水患訓鑿山引水蓄洩有法灌漑民田數萬頃民胥賴之遷東昌府判尤多善政報最晉永寧知州因母老

告歸

華州志

左史字子箴耀州人以明經除光州訓導署遂平固始皆有異政遷知扶溝吏舞文作奸史擇小吏謹愿者補吏延他邑老獄吏教習律令踰月漸次通曉手定爰書吏俯首繕寫莫敢仰視民多鬪殺史講習鄉約

用古教化法兩匝月獄訟哀止縣故多盜史設法購斬盜無留跡縣西北地庠下水潦所聚河溢則助河為患史疏決壅積家各占業縣北境接鄆陵尉氏地勢尤下三縣民互相穿穴史躬自相度總計三縣病利作均水約束刻石水畔三縣共守之楚兵過中州所部畏其擾檄史駐襄城鎮之史遣人入楚籍記其將領部曲某兵前驅某兵後拒車馬芻牧各有成數乃按籍定約僦次舍庀餼糧倚器用兵所至如歸居

人安堵市不改肆視事浹月聲藉甚以勞卒喪西歸

民庶號慟

耀州志

高悌邠州人選貢萬厯二十年任祥符縣丞遇事斧斷
丰裁侃侃難干以私百姓謳曰關節不通今有高公

祥符
縣志

張橘字懷陸富平人天啓辛酉舉人任東阿知縣時邑
多雀苻橘單騎諭以利害渠魁正法餘悉解散陞昌
平守開荒修學遷本州兵憲庚辰奇荒賑米二千餘

石人賴以生轉冀州少參

賈志

金煉色南鄭人天啓壬戌進士任河內令剛明果斷掾吏有關白甫至前輒頤止之曰吾為竟若說吏俯首塞默無一事豐部者當事檄河內運豆餉邊力爭之

始得豁

河南通志

張必大字可菴華州人天啓壬戌進士初授新城令調長清正直廉明愛民禮士以治行異等擢為吏部主事見逆璫祠不拜遂改工部督理顯陵工省帑金三

十萬權稅杭關卒於道

賈志

許國翰涇陽人天啓壬戌進士為儀封令開支河以洩水又損俸置義倉以備賑歷陞岳州道練水兵焚賊船洞庭積寇一清改充東道用武剛車駕驚陣屢挫賊鋒充東人心始固終山西臬司

涇陽志

薛國柱吳堡人以貢生為交城令修城禦寇積穀賑荒因豫寇亂陞河南同知監軍督餉不避勞怨故所至有績終河汝兵備道

吳堡志

張國治扶風人天啓甲子舉人除獲嘉令撫字遺周
咨民瘼凡利於民者必悉心區畫務求有濟時連歲
荒祲國治力請捐租賑恤上官難之國治涕泣請命
語甚切直遂忤上官即日罷歸鄉里論者皆以為榮

扶風

志

馬懋才字晴江安塞人天啓乙丑進士授行人久之以
禮部郎中陞西蜀參議撫治苗蠻諭以恩信叛者釋
甲請降既免官居長安尋卒懋才為行人時陳延安

災荒疏數上詔發帑遣賑延人德之

延安府志

袁楷鳳翔人天啓乙丑進士任開封知府廉毅有大畧郡號煩劇訟案苦沈積楷登堂令數事羅跪一時並

聽剖決無枉人稱為照天燭後陞河北守道

河南通志

王秉鑑字儒賢扶風人天啓乙丑進士初知郾城治行為中州第一調光山郾之叩閭乞留者數千人兩地皆勒碑紀績擢工部主事時都城戒嚴秉鑑冒鋒鏑陞見以守門濬河諸功加級賜賚陞鎮江守京口有

止飲江心水之謠歷官浙江參政致仕

賈志

李燦字斗明韓城人天啓乙丑進士授兵部主事歷汝寧知府時流賊猖獗燦守備甚嚴卒不敢近土寇占居四野計圖刈收二麥以困城中燦傳檄招撫許封以官寇渠殷守祖五十餘人入城邀賞先以花紅賺入城隍廟以三力士俘一賊盡殺之收種無恙士民

得生

河南通志

調平陽捐貲修城不煩州縣人尤稱之

賈志

都景運字永泰涇陽人天啓間恩貢授興濟令邑多荒

屯景運設法招墾調青縣修城禦寇築堤通漕陞河
間府同知條陳截漕糧查海船清委收積招買諸事

悉中利弊卒於官

涇陽志

劉含輝字四勿耀州人崇禎戊辰進士任恩縣令潔己
愛民急公敬事陞高唐知州恩民赴闕保留仍命治
恩又三年擢吏部主事孤立獨行不附中官十年不

得調尋卒

耀州志

王健字大龍三原人崇禎中進士風格峻整動由禮節

授聊城令強幹清慎請改遼糧練餉立折馬之法以

魁俵馬民咸稱便

三原志

張炳璿字義照涇陽人父鑑太原同知督餉偏頭關勤能有聲炳璿以貢生崇禎時授滿城令甫匝歲而綏輯撫循邑稱大治以清直不合於時歸里閉戶著書

詩文多傳世

涇陽志

郭鼎藩字翰宇涇陽人沔縣教諭蔣汝父字玉衡興安人西鄉教諭寇薄沔沔令恒怯鼎藩慨然以城守為

己任泣勵義勇親冒矢石賊被創去攻西鄉汝父亦率衆破之當事稔其才使鼎藩署鳳縣汝父署南鄭兩人皆招撫流移殲捕盜賊克稱其職

涇陽志

黎玉田字含玉乾州人崇禎戊辰進士初任沈邱以才調杞縣英斷不撓流寇嘯聚單騎擒之又有新鄉令房建極者三原人辛未進士流寇至境建極率鄉勇

捍禦城賴以全

河南通志 按建極後事詳見其子廷祥傳中

李國宗字象坤韓城人崇禎庚午舉人授河南許州學

正代篆滎陽蠲俸修城製火器不逾月大賊雲集四

面環攻卒賴保全縣人為樹碑建祠

韓城志

孫鵬鳳翔人崇禎辛未進士知東明縣廉明有幹畧時
荏苒多警鵬單騎至其穴諭以威福渠盜感泣就撫

節屋以寧

畿輔志

辛炳翰渭南人崇禎中由選貢知昌樂縣有禦寇全城

之功

昌樂縣志

陞真定同知駐宣府司餉務裁汰餉額後

併司理於餉廳全活誣罔甚夥擢南陽郡守值兵燹

後空城茂草流亡難復炳翰開荒田招戶口盡心撫恤轉副使攝篆藩司廉聲藉甚及卒柩西還數百里

哭聲不絕

渭南志

梁夢卜三水人拔貢崇禎末授襄陽通判值闖獻寇逆盤踞樊鄧間兵餉甚艱夢卜手檄諭山砦父老無不流涕助輸雖兵戈擾攘中而飲高年崇學校有古良

吏風

湖廣志

按國家設官分職首重廉能三秦夙稱材數尤多

有守有為之士但歷年寢遠遺事久湮雖賢聲猶
播於人間而實蹟難徵於身後今錄其姓字官位
俾後之君子猶有傳焉洪武朝有湖廣僉事雷亮
撫州知府王崧俱咸寧人沂州知州裴榮鄭州知
州馬煥暨子主事馴俱高陵人吏部尚書郭永道
安塞人諸城知縣朱允恭保安人朔州知州石亨
鳳翔人長壽知縣張思敬洋縣人山西叅政喬誠
朝邑人邵陽知縣薛得中文水知縣張羽禮部侍

郎康汝楫俱武功人永樂朝有涑水知縣李森咸
寧人襄城知縣劉昇興平人高唐州判趙勉暨孫
輝縣知縣元涇陽人僉事韶護岐山人工部郎中
何昇麟遊人陳州知州陳介南鄭人工部侍郎李
彪洋縣人登封知縣谷庸城固人兩淮運使梁春
鳳縣人保縣知縣柳方廊州人正統朝有鄆陵知
縣焦元三原人河南知府虞瑄南鄭人景泰朝有
祁縣縣丞呂鐘高陵人順德知府林恭芮城知縣

李英俱寶雞人工部郎中張壽華陰人開州知州
羅楫淳化人天順朝有冠縣知縣劉春富平人眉
州知州李寧城固人紹興知府白玉洋縣人順天
推官尚望武功人嵐縣知縣王準神木人成化朝
有溧水知縣燕壽咸寧人隰州知州員鼎咸陽人
奉節知縣鄭昭延長人福建巡按黃寬鳳翔人新
寧知縣蕭鵬汶上知縣馬驤俱朝邑人德安同知
原性蒲城人高唐知州任福耀州人開封通判焦

思剛盩厔人蘇州通判南漢渭南人夔州同知謝
思道寧羗人安州知州韓綬石泉人定州同知沈
道同州人順慶知府李傑韓城人正德朝有吏部
主事劉序長安人南宮知縣种雲龍咸寧人順慶
通判王仁盩厔人四川僉事梁耀膚施人義隴知
縣楊榮扶風人福建參政柴儒白河人河南布政
使南鏜商州人商河知縣李綱同州人眉州知州
原道蒲城人廣平通判耿儒武功人敘州知府胡

豐三水人嘉靖朝有解州知州朱昂兩淮運使李
蘇新鄉訓導孫學思俱咸寧人戶部侍郎胡嘉謀
蘄州兵備王之弼渾源州知州韓廷學俱涇陽人
蒙陰知縣曹汝葵富平人山西按察使韓朝江醴
泉人副使吳縉輝縣知縣侯羣鳳翔人永平知府
席上珍參政傅應詔主事邢恩暨弟猗氏知縣綸
崇明知縣白豸郎中李佩俱南鄭人清源知縣李
茂春兵部員外李嘉賓澧州知州樊盛俱洋縣人

彰德知府傅汝礪寧羌人通判欽徽沔縣人山東
僉事劉九容大同通判龍鳳俱榆林人蜀府審理
駱永聰漢陰人重慶通判王化同州人副使郝汝
松綏德人隆慶朝有永寧知縣姚登沁州知州郭
然俱咸寧人汝寧同知蘭養直華陰人萬厯朝有
四川副使王道純懷慶教授陳力俱咸寧人新鄭
知縣韓期維主事張弘襟俱鄂人莒州知州來賀
布政使秦一鵬參政咎雲鶴南康知府張善治俱

三原人僉事劉三才信陽知州王從諫俱涇陽人
知州任澄清蓋屋人戶部尚書張經世渭南人襄
城知縣李光先延安人大同巡撫李甲寶雞人龍
安知州任祿南鄭人四川副使謝震城固人夏縣
知縣韓薰洋縣人山西參政劉廷謨寧羗人衛輝
通判劉國銘榆林人山東布政使劉卿興安人四
川按察使柴應乾白河人參政馬怡暨弟尚寶寺
卿慥同州人永平同知井東星河南參政李用中

俱朝邑人戶部主事張應辰宜君人漢陽令馬御
綏德人天啓朝有兵部員外王懋學南鄭人崇禎
朝有交河知縣王家佐三原人御史田起鳳南鄭
人運副周達西鄉人知縣左佩琰耀州人平陸知
縣趙鳳雛三水人皆有聞於時

本朝

楊日昇字旭孟富平人七歲喪母不食者累日祖一
正泣諭之始輟哀每獨居則流涕天啓辛酉舉於

鄉後補陳留學博攝行邑事悉除苛政會中原多盜日昇練兵守陴城賴以全擢臨晉知縣改高平首請蠲宿逋四千餘金築城浚池保障屹然順治二年用薦者起知輝縣五年調繁黃岡值湖南用兵禁旅雲集所需糗糧芻茭舟車版榦應期立辦勞績稱最九年大旱日昇虔禱得雨又捐俸勸賑以濟之民無失業量移嘉興同知未半載乞歸家居喜賓客矜然諾詩文瑰麗有六朝風得之苦吟

力索者為多

宋學程華州人前庚午舉人有膽畧明末盜賊蜂起
學程家居守禦有方初令沂水愛養士民有廉聲
蝗不為災鄰邑蒙陰多積逋臺司稔知其才檄令
兼攝不煩夏楚賦完報最擢永平府推官

國初以隨征功擢關南兵備道以病歸學程性友愛
有從弟析居久念其貧復與合爨疎屬待以舉火
者甚眾

韓文鏡咸寧人崇禎辛未進士歷官杭嚴道兼權稅務先是浙稅叢弊文鏡令依科則平納商民交口稱頌在官尤重禮教嘗捐俸設義學薪水膏火之資纖悉俱備俾就業者得專志誦讀營兵亦來習禮一時風尚彬彬如也以親老告歸

張兆熊字宜男洋縣人崇禎丙子舉人性至孝居父喪哀毀踰禮流賊寇洋兆熊偕邑令郭一龍募鄉勇數百勦賊賊遁城得不陷洋邑舊有浮糧千石

賦役繁苛民甚苦之兆熊力請當事禁革殆盡歲
荒捐貲賑粥全活尤多兆熊先任滑縣調孟縣尋
擢御史歷淮徐郴桂參政所至有聲在湖南兩經
兵燹勞績尤著致仕後經畧洪承疇薦為蒼梧道
辭不赴以德望舉鄉飲賓

薛起鳳韓城人崇禎丙子舉人性孝友撫孤姪孤甥
督課不輟甥後舉進士有名起鳳初任黎城造耕
織具教民農桑值歲儉勘實即為請豁又採山開

密制器以利永久其建置類多實政改任筠連抵任只攜蒼頭一人以供掃室執爨之役士民服其清正卒於官貧無以殮民爭致賻扶襯以歸且建祠祀之

艾元復字意九米脂人由舉人除河南偃師令邑經闖氛後民氣未蘇元復一意休息賑窮困招流亡數年竟成樂土擢監察御史邑人泣送之越數年復過洛士民出境懽迎依戀馬首幾不得行

郭堯京字平野高陵人崇禎己卯舉人順治十年知石城縣殘燬之後刻意興釐先是大盜陳其綸與東關盜黃允會各擁衆踞砦鄰界羅漢巖劇寇復沿鄉肆劫堯京募鄉勇伏險堵截其綸授首餘賊潛遁民賴以安在任八年陞祁州知州

郭忱華州人前己卯舉人知嵯縣土瘠民貧忱課農桑興學校發奸摘伏豪猾畏之時海氛未息閩帥俞某與陳宦有隙假支應不給為辭將為亂各路

戒嚴忱夜半奉巡撫檄赴營招安即子身詣俞言
詞侃侃俞俯首聽命事遂解後卒於官櫬歸老幼
泣送不絕

周燦字旭公臨潼人父祚永從學馮從吾由鄉薦令
宿遷有善政燦其長子也崇禎壬午舉於鄉

國初授寧遠教諭順治間猗賊亂河西偽檄至燦率
諸生立碎之諭衆堅守賊不敢犯以薦擢梓潼知
縣燦抵任遍諭流民勸以復業有至者為經營廩

舍散給牛種修青龍白馬二堰農業大興復設塘
汛緝奸宄建壇壝禮師儒次第設施條理井井十
一年陞雷州府同知雷孤城瀕海為瓊南要路巨
寇王之翰等盤踞西海十餘年燹請於臺司以招
撫自任乃直抵賊巢諭諸賊以逆順利害賊皆羅
拜聽命遂招降之翰等督撫特疏獎薦十五年擢
守鳳陽尋卒所著丹垠文集皆其弟燦所輯也燦
字星公祚永季子順治乙亥進士由翰林改授刑

曹矜全甚衆奉使安南宣布

天朝德意封祭悉協典制及還記其山川風俗以獻出
守南康設救生船以拯覆溺修白鹿洞書院聚徒
講學多所成就督學巴蜀甄拔孤寒一時賞識皆
知名士獲雋者尤衆又奏請土司子弟亦令照例
入學著有願學堂集

李承尹三原人崇禎癸未進士初督三楚學政綽有
師表及備兵沔上尤多惠政沔故有歲納官柴後

業戶逃竄遺患比鄰承尹判田還里永蠲其征城
東有蓮池舊納魚課遺累網戶承尹立碑蠲稅一
方以寧

姚廷璉字華商膚施縣人貢生六歲失怙事母以孝
任東平州倅攝州篆年餘勸農興學鋤奸除暴民
賴以安境內有伏莽躬擐介冑殲之盜遂息當遷
秩以請蠲浮費言過激忤上官遂罷歸會庚辰辛
巳歲大饑罄資以貸貧者明年當償盡出其券焚

之順治己丑王永強叛陷延安大兵進討廷璉從
行間督轉輸寇平以功委知保安縣請除浮丁蘇
民困邑人尸祝焉

陳安國字斗坦沔縣人生員

國初以僉事監軍四川巨寇攻保寧甚急安國詣西
安乞兵總督孟喬芳應之圍遂解時姚黃賊衆數
萬方猖獗安國招降之當事忌其功誣下獄未幾
事得白陞井陘道境有鹵地產鹽安國請開局便

民至今利賴尋以專擅去官會言者白其罪補九江道屬邑多荒糧安國力請減免以數萬計百姓德之致仕歸修黃金峽險道三百里建連雲棧圯壞橋梁數十處土人立碑記其事

劉培陽字敬錫三原人順治乙酉舉人授建德令時劇盜李布嘯聚培陽至審形勢設方畧甫三月盜平政聲大著補直隸南和澧水溢沒田千畝培陽築堤捍禦人名其堤為劉公堤立祠尸祝焉

王繼祐字植三富平人順治乙酉舉於鄉授鎮平令
不以繁苛擾民郡城協濟夫馬舊例徵折貯庫恆
苦不支繼祐因事撙節遂多餘息河東鹽課計口
銷引南陽丁浮於課鎮平課浮於丁繼祐力請當
事裒益得平有捕官誤收偽引事覺吏白派補里
甲繼祐不許獨捐俸助之鹽使為疏其事於

朝後乞歸子象天順治丁亥進士令臨漳多善政繼
擢太僕寺丞疏陳臨漳三害一協濟宜恤一經界

宜明一優免宜均俱

報可漳民三累遂除厯湖廣學道以廉明著

郭嶷然字因之朝邑人順治乙酉舉人由交城教諭
遷閩清令鄉試分校府推官以千金屬其私人執
不可以憂歸補靖江瀕海多盜守禦有方盜逼城
下登陴諭以大義即引退再補昭化有女子為盜
主交通甚廣前令蒞任皆先往致敬嶷然至吏以
故事白怒斥之亡何女子來謁偉岸桀黠不可馭

疑然叱捕下獄須臾訟者盈階款証皆實立斃之
其黨震散撫御殘黎以清白自矢地產塊金俗呼
狗頭金有獻者悉却之解官後囊無長物

楊在陞字台卿三原人順治丙戌進士任河南扶溝
令扶溝地瘠民流在陞諭令復業三年始算緡行
折畝法給以牛種又請免河夫四十名由是田塍
盡闢增賦七千石有奇大盜張元錫等倡亂請於
中丞擒而磔之時有劉司馬者為僕劉馨所訐遂

被逮在陞曰以僕許主不可訓也直之馨嗾其黨
將為亂在陞因立寘於理邑民乃安

韓文富平人順治丙戌舉人授文安令邑居畿南下
流水潦西注賴河堤為固文莅任堤潰歲大侵文
捐俸易粟民無失所城東土寇猖獗文親率鄉兵
捕誅賊首境內以寧又文邑旗民雜處爭訟日滋
文常單騎遍歷莊屯多方開諭俗用丕變

王承祖字貽雲渭南人順治丙戌領鄉薦除晉江令

捍禦海寇城賴安全邑瀕海有大鎮最稱饒沃利
其有者誣鎮民與賊通欲屠之承祖力辨於大帥
事遂寢尋擢兵部主事遷郎中累陞工部侍郎告
歸值歲饑承祖罄所有賑濟全活甚衆及歿鄉人
思其德立祠祀焉

李振麟韓城人順治丙戌舉人初令臨武臨邑自賊
首曹贛子盤踞積年人民蕩析城中茅舍百間盡
屬兵營振麟多方招撫逃亡稍集臨舊有二十四

里兵燹後流移過半丁糧不均振麟力請於上官
編為十二里侵隱之弊一清邑境與粵東接壤逼
近徭崗振麟練鄉勇八百人立練總四名統之扼
要設守諸徭不敢犯界考績擢中書舍人以母老
乞歸母壽九十八振麟孺慕終身

劉璽字爾符朝邑人順治丁亥進士除烏程令邑附
郭素煩劇璽釐剔奸弊豪強懾伏漕糧立倒厥法
他縣多倣之擒治太湖巨盜親搏戰水上獲渠魁

白花蛇沈三斃於獄羣盜震懾遠遁會長興歸安
同時缺令兩縣民爭求璽署縣事歸民先得璽肩
輿去臺司感其事遂允之以憂歸因錢糧磨勘謫
四川按察司照磨署通江簡州皆有惠政生平多
著述有鑰山集若干卷子峒岵峒字星柱康熙戊
午舉人辛未壬申間歲大祲邑令諱災峒力請臺
司簡牘累上會

命大臣勘賑峒具呈朝邑災狀乃得賑全活無算岵已

卯舉人有文名

米襄蒲城人順治丁亥進士初授邢臺令邢故有水
泉漫漶日久民未獲利襄至即度地開渠以資灌
溉西山袤延數百里羣盜盤踞四出剽掠襄訓練
鄉勇親勦賊巢渠魁授首民患以息內擢臺員旋
出按江西南入境有郡守暮夜餽金襄拒不受廉
得其貪污實蹟即劾罷之他如興屯政設江防奏
豁荒欠審結歷年讞案嚴禁開採皆有裨實政視

事一年外艱歸服闋檄取補官以母老乞終養遂
不復起

張重齡字九如涇陽人順治戊子舉於鄉十二年授
直隸邢臺令重農息訟除積弊雪冤獄政績茂著
報最補工部都水司主事奉

命督通昌草場督寶源錢局又出督臨清稅務兼攝倉
儲錢法裕國通商措施悉當大司空重其才會河
決淮安遴員協理以重齡名

上先是南北河決塞不常中河一役九載未就尤稱危
險重齡至遂奏績復

命後以積瘁成疾給假歸卒子鼎梅康熙丁丑進士

劉矩宗字仲旋渭南人順治戊子舉人授溫州司李
方海孽未靖人心反側矩宗開誠撫納歸降日衆
鎮以安靜有犯者執法不少貸民畏而懷之海濱
地久蕪矩宗親行勘視免其虛稅更築長堤以資
蓄洩開東甌括婺諸驛路行旅便之卒於官

王帷籌華州人順治戊子解元先是逆變起帷籌負
母入山備歷艱苦康熙四年授祁縣令創義學講
書課藝無虛日祁水舊為豪強所據帷籌責令毀
壩俾無壅塞資民灌溉農事畢婦子攜羊酒祝之
并立祠祀焉五子俱成名

焦勤武功人順治戊子舉人初宰臨桂息事寧人循
聲大起擢刑曹治獄明允會

召問粵中利弊條對明晰仍奉

命恤刑西粵全活甚衆尋兵備井陘值歲旱率屬終日
跽赤日中甘雨立沛人以為精誠所感罷歸後母
卒過哀成疾仍晨昏侍父所分析田舍盡以膏腴
讓弟雖俸餘亦不己私父國鼎少年時自書院晚
歸途遇一女私奔毅然却之蓋義方特著云

朱廷璟字山輝富平人前兵部侍郎國棟子闖逆據
西安多械致士大夫攫其金廷璟被執俄賊敗得
免順治乙丑成進士改庶吉士累遷登萊副使時

登兵以缺餉謀作亂守白其狀欲捕之廷璟曰是
速亂也不可閱庫金與缺額相當立召諸弁唱給
之餉至仍如數納庫中軍無譁者海寇陷瓜儀圍
江寧聲言將分兵突山左一日夜候騎數十至將
吏皆失色廷璟但密增沿海戍守舉止自如逋寇
于七勢甚熾廷璟至即蒲伏聽約束廷璟諭遣之
語人曰賊子瞻顧非常宜漸除之會陞河南參政
去後果亂海上未幾廷璟以憂歸再補左江遂致

仕林居後絕口不談世事性好古遇鼎彝書畫輒摩娑不去手人以是覘其風度

王孫蔚字茂衍臨潼人與叔元衡元士同登順治壬辰進士由刑曹厯官湖廣按察福建布政以公事左遷備兵川東視學楚省未幾歿於任蔚少有神童之譽弱冠舉鄉試第二尤長於吏事在刑曹都下有玉銘錢穀茂衍刑名之謠玉銘者王太司農弘祚也任楚臬時值軍興羽書旁午臺府倚重一

時綰五篆手握朱墨三筆判事如風雨諸司掾持
案皆進目覽口誦悉皆瞻舉詩才亦婉麗成一家
著有輶香集字天寵登賢書

蕭恆字月如三原人順治壬辰進士授安福令邑田
水衝沙壅多虛糧恆力請直指題減糧額千餘石
至今賴之遷印州知州

侯于唐字賡明三原人父達先有隱德嘗歲荒代鄉
人輸賦千金請於官取逋賦冊悉焚之曰吾安敢



重煩大令為吾追逋乎于唐登順治壬辰進士由
庶常擢御史終養歸再起巡鹽巡漕奉

詔以敬慎剛方褒之居鄉葺學宮築白渠堤民賴其利
祀鄉賢

張好奇字知天朝邑人順治壬辰進士初知鞏縣念
河濱灘地起科時遭衝沒遺稅病民力請每三年
一勘丈以地有無為存豁鞏人德之尤慎刑獄擢
刑部主事矜全為多歷官河南學政

索景藻字二因蒲城人順治壬辰進士邃易學性尤謙謹生平不道人短嘗之田見人有盜刈其麥者遽避之任樂平知縣初任時盜賊充斥景藻不加刑戮諭以大義期年而境內大靖舊賦逋額累萬景藻曲為勸諭不三月輸納一清以勤勞得疾卒於任士民哭奠日數千人祀名宦

習全史同官人順治壬辰進士初令涇縣補內江有聲陞杭州府同知善聽訟漁臨關有奸宄與關蠹

交通害政甫下車即行剖禁諸暨某持兩脰足屢
控不止全史曰此必暮夜行竊為主人所折顧以
誣人可乎立投於江某驚服訟始息後卒官貧無
以殮制府李率泰為歸其櫬

楊端本潼關人順治乙未進士授臨淄知縣開淄西
龍首渠民享其利廉明仁恕輿頌歸之性孝侍親
疾湯藥必親嘗處鄉里謙厚敦睦性好施濟親黨
中貧不能舉喪者捐金助之

石之玟甘泉人順治戊戌進士歷睢寧桃源知縣有
惠政二邑皆濱河河臣靳輔方鳩工未集會

翠華南幸引

見之玟有老成勤慎諳練河務之裒守令以下咸榮之
尋擢福州知府

王又旦字幼華邵陽人順治戊戌進士授潛江令潛
賦役偏重又旦摘發隱漏逃亡返業潛地居襄樊
下流漢水歷安陸下大別每夏秋水漲為患又旦

勸民趨事長堤屹然迄今無恙甲寅滇逆告變大
軍駐荆襄潛當孔道羽騎絡繹徭役芻芻應時立
辦擢給事中歷吏戶二垣尋典廣東鄉試還過花
山建議設縣置官以成控扼之勢盜藪一清有黃
湄詩集十卷行世

牛光斗中部人方流孽未靖仇家構陷其父以通賊
繫獄光斗度勢不能脫即詣軍前請於帥求以身
貸會烈日中忽大雨電帥廉其冤釋之順治戊戌

成進士官諸暨令減耗羨懲刁悍邑有機戶三百
家例供織造使者樣紬一疋光斗申請革除坐強
項落職百姓咸詣臺司訟冤奉

旨復任尋丁內艱歸年七十九卒

李光宸字君沃三原人少有遠志多大畧逆藩變作
制府哈占重其才延之幕下一切機務咸諮之會
蒲城令以民叛告制府將屠之光宸以為未叛制
府按之果誣始得寢十八年占奉

命與奮威將軍王進寶勇畧將軍趙良棟謀分道取蜀
議未決光宸進曰逆無能為也湖南特下流地今
退屯衡州所用皆親屬猜嫌易起大兵乘之如拉
朽耳進寶良棟大奇之令從軍入蜀即舉為廣元
令廣元久經兵燹人無固志有訛傳逆黨譚弘復
叛者光宸晝夜戎服行城上語民曰我縣令也賊
來我以身當之汝曹無恐人心始定先是保寧兵
餉悉由廣元陸運光宸曰盍以舟運出昭化力請

於制府從之公私俱利以內艱歸服闋補金堂初
金堂與新繁諸邑並以清白江為蓄洩年久渠壞
光宸詳視地勢復開新渠於是灌溉如舊光宸性
明決而資復愷悌故所至有惠澤

劉元勳咸陽人順治己亥進士七齡失怙哀戚如成
人登第後讀書中秘以祖母年高求得終養祖母
卒宦遊所歷必奉母偕行及卒哀毀踰禮服闋分
巡淮徐改山西糧驛道嚴禁官馬累民委賑大同

無冒無偏發粟處有槐一章民懷其德號為劉公槐尋致仕歸逢歲祲周給里黨兼為族人輸舊稅親疎感之

董元俊華州人順治己亥進士事親至孝初任黃岡知縣繼補句容除積弊二十條興額外利七事歲荒捐俸賑濟邑有虎患獵捕不得元俊宿廟虔禱虎遂遁跡致仕後引掖後進周恤宗黨歷久不倦李弘樸字元文三原人由恩貢授永州府通判擢知

桂陽州桂陽新遭兵燹檣勞來安輯凋敝頓起時
大兵進取滇黔轉輸不給檣繪圖上陳請寬民力
竟左遷去桂人籲留不得勒碑以志去思居家施
予不倦濬河築梁倡始捐助里人皆沐其澤子彥
瑁彥珣彥瑁字輯五康熙丁未進士值三藩變彥
瑁參軍秦蜀以功擢肇慶府知府撫綏釐剔政聲
大著再補黃州守卒祀名宦彥珣字重五從學李
顥默契儒先宗旨每無事輒靜坐認取未發氣象

丁卯登賢書官中翰聞兄訃哀痛幾絕尋卒

耿獻忠字伯良武功人貢生順治初分巡閩中適海氛未靖將士俘獲不辨玉石獻忠詣臺司力爭得訊釋數千人遷廣東左布政使時武弁驕橫士夫多被摧折部使者重獻忠名悉聽裁決粵東巨族多賴以寧

姬琨字雪石華州人贈太僕文引子以難廕入成均歷官戶部主事督昌平糧儲會計如額擢戶部郎

中又出為榆林糧儲時榆林兵乏食琨先事籌畫
兵賴以安奏請創立鼓鑄泉貨流通利垂永久復
權江南蘆政兵燹後民多流亡琨招集勸諭田廬
如舊課亦無缺遷保定巡道盜賊一清又遷衡永
道却餽除奸實政茂著嘗登衡山西望慨然有歸
休志即去官歸

任璣字公義涇陽人少力學工文順治辛丑進士筮
仕滕令滕邑自明季流亡保甲盡廢璣畫境為八

卦保置長鄉設約其東界連山密箐中多伏莽璣擒斬首惡餘令歸農其南界接境徐碭距縣治遠踰數百里民抗不輸賦璣開誠勸諭化為淳良復以戶口版籍無憑力請編審自此欺隱都絕賦無逋額先是河臣令璣督浚八閘河道如期告竣擢兗州府倅分司泲河尋改運河同知運河自黃淮以上灌輸恃七十二泉璣遍厯相視疏源滌流糧艘無阻又築漕河東堤泗河西堤以扞水患時奸

民請築南旺西湖以擅水利璣謂汶河秋漲賴此
洩水築之則八斗必塞運道將梗事遂寢遷長蘆
運使建議引鹽積滯必通銷於引鹽不至之地其
產鹽州縣例不食官鹽者奸商坐引至數千計悉
請罷於是商力漸甦鹽課無損陞直隸守道以良
鄉旗民經界未正奉

旨勘驗溽暑積勞竟得疾歸卒

張召南字仲文朝邑人順治辛丑進士知安福縣民

俗愚戇不供役召南單騎往諭以大義咸感泣輸
賦邑境南接茶永西連沙攸康熙十三年永寇楚
逆俱蠢動賊將取徑安福兵萬餘薄城下城遂陷
召南赴制府請兵以復其城時議分滿兵駐安福
召南力陳不可乃止是年秋召南方在省賊突至
城復陷召南馳歸集鄉勇攻城賊疑大兵至踰山
而遁遂復安福凡招撫賊將五十七員難民萬餘
人因勸諭開墾盡散給牛種得田二千餘頃擢中書

舍人

衛秦翰韓城人順治辛丑進士少孤育於伯父景瑗
景瑗死闖難兵燹相仍旦暮不給秦翰閉戶力學
成進士後猶莊誦如諸生時授靈壽令民田水衝
沙壓戶口逃亡逋賦無著前令率被劾去秦翰至
遍閱災地詳詢疾苦請令祇納本年正賦巡撫惡
其擅將劾之檄太守親勘勒令開征秦翰不奉令
太守怒杖吏且荷校以脅之秦翰曰不開征一吏

死開征則百姓死矣言詞剴切太守亦心動秦翰
又繪圖謁巡撫備陳流離狀哀懇不已巡撫惻然
入告永谿地糧二千六百有奇自此歲豐民樂邑
無逋賦遷中書科中書二十八年擢禮部主事歷
郎中尋出知龍安府下車即革里民供應陋例在
任九年鎮撫苗獠結以恩信所隸三十一司皆輯
服以年老致仕歸數百里中多泣送者

陳嘉績三原人康熙癸卯舉人授濬縣令以風化為

己任作合律

聖諭解刊書遍給勸懲並用民風大洽又悉除絕戶女丁
錢孤寡咸額手相慶再補澄海因邑居海濱招集
鄉勇嚴飭守望有海寇千餘乘夜薄城嘉績率衆
登陴矢石雨下賊大潰邑以無恙事

聞擢御史歷掌河南道法司鞫獄凡夾訊者或至日昃
散署始釋嘉績語法司宜共體欽恤至意令得供
即釋游陞大理寺少卿扈從

蹕西巡過濬士民擁道爭願識舊尹陳公面未幾乞歸
先是嘉績父諸生堯道潛心醫學製方奇效所著
有傷寒辨證痘疹辨證二書嘉績校定付梓以竟
前人之志焉

趙璠麟遊人由恩貢判景州佐理有聲擢興化令省
催科重農桑民貧不能耕者貸給牛種俾無失業
值歲荒發粟賑濟多所全活邑地居淮河下流每
歲工作枝帚悉賦於民璠令河壩遍植柳葦以備

修築之用省費無算未幾致仕歸尤敦孝友任恤
之誼

梁鳳翔咸寧人康熙癸丑進士性純孝少失怙善事
孀母母疾日夜籲天願以身代母疾遂愈二十五
年授孝感令履畝均賦積弊一清壬申癸酉間秦
楚游饑鳳翔捐俸勸賑多所全活擢潞安太守革
除漏卮勒石永禁期年政成以足疾乞歸潞人懷
之

郭毓秀字鍾山耀州人舉人知贛縣事康熙甲寅閩
粵之變大兵多道贛有蜚語謂王田村民通逆主
兵者謀殲之毓秀言於撫臣佟國楨鎮臣哲爾肯
曰

國初兵寇交訐贛四境蕭索獨田村鷺谿一二井里
能自保聚遂致蕃庶遽以大逆誣之非惠養元元
意也國楨爾肯皆然之毓秀即馳入田村令毀其
壘村民供輸芻糗倍於他所遂得保全邑人至今

述其事猶有隋淚者

劉蔭樞字相斗韓城人康熙丙辰進士性至孝事親先意承志視羣從如同懷值歲饑盜起里黨多不給為貸粟賑荒築堡以守大河自縣東北南出龍門山中兩岸絕壁鉤挽莫施蔭樞冶鐵為柱索舟緣以進又築濠水石橋修柿谷坡及城中通衢行者便焉初任蘭陽報最入諫垣章數十上如論秦豫兩省事宜及楚省均糧事皆關大計悉

報可旋出分巡贛南除私收門稅又米市有牙帖銀
協濟定南蔭樞計歲入置田以租充額牙稅永除
癸未

駕幸西安時蔭樞家居因迎

覲潼關即擢雲南按察使進布政使滇海秋漲為害
請疏之兼建六河岸閘蓄洩有備尋撫黔甫至釋
苗狎之淹繫者數百人會烏蒙威寧土苗構難

命滇蜀黔督撫提臣於畢節會勘蔭樞至傳檄召之諸

苗素服蔭樞恩信率衆偕來蔭樞諭以

聖朝德威諸苗帖服遂釋去五十四年西鄙出師蔭樞

奉

旨馳赴巴爾坤周閱軍營既復

命仍撫黔未幾奉

旨屯田塞下歷三年

召還京師六十一年與千叟宴雍正初

皇上篤念老成賜金歸里年八十七卒所著有周易蓄

疑春秋蓄疑梧垣奏議宜夏軒雜著行於世

劉曾字魯如臨潼人父秉攜邃易學有學易寤言八
卷曾生而穎異弱冠即從李顥講學康熙己未成
進士授潯浦知縣潯浦山深地僻糧役不均曾履
畝親大官無遺利地有餘力事竣湖南撫臣下其
冊於所屬俾為式三載擢吏部主事遷員外有墨
吏以千金為壽曾笑曰劉曾豈受暮夜金者耶正
色却之再遷郎中補貴陽知府黔地多苗獠家尤

稱獷悍時竊出行劫黔民亦時誘其幼弱者鬻於鄰境曾為捕奸民畧販者得數十人正其罪所得苗子女悉還之有不知所自者令郡民無子女者撫之苗狎聞而感泣不復行劫郡倉歲贏米百石曾令別貯一倉春秋時有耕獲不給者補助之郡大治會考最得

俞旨

賜蟒服旌勞擢雲南驛鹽道尋陞按察使五十六年致

仕歸

史流芳華州人康熙壬戌進士授廣東臨高令臨積
逋八萬有奇流芳先核逃亡戶口每歲征止三千
餘金復履畝丈量分別荒熟請豁者十之七於是
招集流民捐給牛種課農興學邑人頌之流芳父
母早亡終身哀慕兄客死肅州徒步三千里扶櫬
而歸撫兄女如己出為之擇配凡從子弟之孤者
悉為婚嫁幼時經師卒為營喪葬無缺少貧苦冬

夜讀書嘗置足草籠中成名後猶手不釋卷博通淹雅教授生徒出其門者多知名士

陳朝君韓城人康熙壬戌進士事母至孝與兄弟叔姪三世同居友愛甚篤初令蒙陰重學校嚴保甲革行戶蠶稅設催科紙阜吏民安之朝君聽訟明決嘗於省會一日審結十大案臺司皆器重之擢戶部主事外省奏銷例有私餽盡斥之遷刑曹多所平反視學中州號稱得士

趙隆脣膚施縣人拔貢生授固始令多惠政上官議
加賦隆脣固爭之不得以憂卒上官感悟寢其事
時有固始一官死汝寧萬姓活之謠

党光前膚施人事繼母以孝聞由拔貢除德平令政
尚慈惠讞獄尤詳慎曰蒼鷹乳虎為世所痛吾忍
蹈之乎德平旗逃多所株連光前發摘甚神不能
誣枉保全甚衆後以病卒於官櫬歸士民執紼泣
送數百里

焦映漢武功人太學生初為巴縣令值譚弘等復叛
巴人震恐映漢募鄉勇捍禦全城以卓異薦歷刑
部員外郎中尋出守平樂調慶遠大中丞彭鵬每
歎賞其才晉雷瓊巡道映漢宣揚

聖諭導民向化明丘文莊海忠介瓊產也風節冠一鄉而
遺文散佚因重刊為粵人倡及司臬江蘇會總督
與巡撫張伯行不協並誣劾映漢

聖祖察其冤復原職改任廣西卒

王承烈字遜功涇陽人康熙乙酉以五經發解己丑成進士選庶吉士授檢討雍正初轉監察御史巡視東北兩城時有巨猾倚官勢為奸謀陷富貴吞其貲承烈搜捕之寘於理輦下肅然嘗

名對

養心殿講大學明明德章稱

旨賞賚甚渥次年以諫垣督湖北漕從民請就便南兌省運費數千緡旗丁撥運則以保甲法聯之軍民

帖服報最擢江西布政使司署故有通吏二人擅
竊威柄承烈斥弗用鈎考振作諸弊一清累陞刑
部侍郎邁疾猶勉力視事卒之夜有慈烏數千繞
室

賜祭葬有加禮云所著有日省錄毛詩解尚書今文解
諸書

陝西通志卷五十七下